

摘藻堂四庫全書薈要

史部

欽定四庫全書蒼要卷六千一百二十八

遼史卷三

元中書右丞相總裁托克托等修

本紀第三

太宗上

太宗孝武惠文皇帝諱德光字德謹小字耀庫濟太祖
次子母淳欽皇后舒嚕氏唐天復二年生神光異常獵
者獲白鹿白鷹人以為瑞及長貌嚴重而性寬仁軍國

事多所取決天贊元年授天下兵馬大元帥尋詔統六軍南徇地明年下平州獲趙思溫張崇回破箭竒山呼遜奚諸部悉降復以兵掠鎮定所至皆堅壁不敢戰師次幽州符存審拒于州南縱兵邀擊大破之擒裨將裴信等數十人及從太祖破于厥里諸部定河壩黨項下山西諸鎮取回鶻單于城東平渤海破達囉克部東西萬里所向皆有功天顯元年七月太祖崩皇后攝軍國事明年秋治祖陵畢冬十一月壬戌人皇王倍率羣臣

請于后曰皇子大元帥勲望中外攸屬宜承大統后從之是日即皇帝位癸亥謁太祖廟丙寅行柴冊禮戊辰還都壬申御宣政殿羣臣上尊號曰嗣聖皇帝大赦有司請改元不許十二月庚辰尊皇太后為太皇太后皇太后為應天皇帝太后立妃蕭氏為皇后禮畢閱近侍班局辛巳諸道將帥辭歸鎮己丑祀天地庚寅遣使諭諸國辛卯閱羣牧于近郊戊戌女直遣使來貢壬寅謁太祖廟甲辰閱旗鼓客省諸局官屬丁未詔選約尼氏九帳

子弟可任官者

三年春正月己酉閱北剋兵籍庚戌閱南剋兵籍丁巳
閱皮室伊喇摩哩三軍己未黃龍府婁尼河女直達囉
克來貢庚午以王郁為興國節度使守中書令二月辛
長灤己亥特哩袞尼嚕古進白狼辛丑達囉克來貢三
月乙卯東蒐癸亥獵殺獬山乙丑獵松山唐義武軍節
度使王郁遣人以定州來歸唐主出師討之使來乞援
命奚圖哩塔拉往救之四月戊寅東巡己卯祭麋鹿神

丁亥於獵所縱公私取羽毛草木之材甲午取箭材赤
山丙申獵三山塔拉敗王宴球于定州唐兵大集塔拉
亟請益師辛丑命特哩袞尼嚕古都統扎拉赴之五月
丙午建天膳堂獵索囉山戊申至自獵丁卯命林牙圖
魯卜討烏爾古部己巳女直來貢六月己卯行色克色
哩禮秋七月丁未圖魯卜獻捷壬子王都奏唐兵破定
州塔拉死之尼嚕古扎拉等數十人被執上以出師非
時甚悔之厚賜戰歿將校之家庚午有事于太祖廟八

月丙子突厥來貢庚辰詔建應天皇太后誕聖碑于儀
坤州九月己卯圖魯卜遣人獻烏爾古俘癸未詔分賜
羣臣己丑幸人皇王貝第庚寅遣人使唐辛卯再幸人
皇王第癸巳有司請以上生日為天授節皇太后生日
為永寧節冬十月癸卯朔以永寧節上率羣臣上壽於
延和宮己酉謁太祖廟唐遣使遺玉笛甲子天授節上
御五鸞殿受羣臣及諸國使賀十一月丙子布古德來
貢辛丑自將伐唐十二月癸卯祭天地庚戌聞唐主復

遣使來聘上問左右皆曰唐數遣使來實畏威也未可
輕舉觀釁而動可也上然之甲寅次杏塢唐使至遂班
師時人皇王在皇都詔遣耶律伊濟遷東丹民以實東
平其民或亡入新羅女直因詔困乏不能遷者許上國
富民給贍而隸屬之升東平郡為南京

四年春正月壬申朔宴羣臣及諸國使觀俳優角觝戲
已卯如瓜塢二月庚戌閱約尼氏戶籍三月甲午望祀
羣神夏四月辛亥至自瓜塢壬子謁太祖廟癸丑謁太

祖行宮甲寅幸天城軍謁祖陵辛酉人皇王貝來朝癸
亥錄囚五月癸酉謁二儀殿宴羣臣女直來貢戊子射
柳于太祖行宮癸巳行色克色哩禮六月丙午圖魯卜
獻烏爾古俘分賜將士巳酉西巡巳未選輕騎數千獵
近山癸亥駐蹕涼陁秋七月庚辰觀市曲赦繫囚甲午
祠太祖而東八月辛丑至涼陁謁太祖廟癸卯幸人皇
王第巳酉謁太祖廟九月庚午如南京戊寅祠木葉山
巳卯行再生禮癸巳至南京冬十月壬寅幸人皇王第

宴羣臣甲辰幸諸營閱軍籍庚戌以雲中郡縣未下大
閱六軍甲子詔皇弟魯呼帥師趣雲中討郡縣之未附
者十一月丙寅朔以出師告天地丁卯餞皇弟魯呼于
西郊壬申命大內特哩袞告出師于太祖行宮甲申觀
漁三义口十二月戊申女直來貢戊午至自南京

五年春正月庚午皇弟魯呼拔寰州捷至甲午朝皇太
后二月己亥詔修南京癸卯魯呼還自雲中朝于行在
丙午以先所得渤海戶賜魯呼丙辰上與人皇王朝皇

太后太后以皆工書命書于前以觀之辛酉召羣臣議
軍國事三月丙寅朝皇太后丁卯皇弟魯呼請赦宗室
錫里郎君以罪繫獄者詔從之己巳幸皇叔安圖第辛
未人皇王獻白紵乙亥冊皇弟魯呼為壽昌皇太子兼
天下兵馬大元帥壬午以龍化州節度使劉居言同中
書門下平章事乙酉宴人皇王僚屬便殿庚寅駕發南
京夏四月乙未詔人皇王先赴祖陵謁太祖廟丙辰會
祖陵人皇王歸國五月戊辰詔修褒潭離宮乙酉謁太

祖廟六月己亥射柳于行在遂如汧柳湖丁巳拜太祖
御容于明殿己未達魯特來貢秋七月壬申烏爾古來
貢戍子薦時果于太祖廟八月丁酉以大聖帝后宴寢
之所號日月宮因建日月碑丙午如九層臺九月己卯
詔錫里普寧撫慰人皇王庚辰詔置人皇王儀衛丁亥
至自九層臺謁太祖廟冬十月戊戌遣使賜人皇王胙
祭卯建太祖聖功碑于舒伊旺尼珠琿溫甲辰人皇王
進玉笛十一月戊寅東丹奏人皇王浮海適唐

六年春正月甲子西南邊將以慕化哈噶斯國人來乙丑達魯特來貢丁卯如南京三月辛未召大臣議軍國事丁亥人皇王貝妃蕭氏率其國僚屬來見夏四月己酉唐遣使來聘是月置中臺省于南京五月乙丑祠木葉山乙亥至自南京壬午謁太祖陵閏月庚寅射柳近郊六月壬申如涼陘壬午烏爾古來貢秋七月丁亥女直來貢己酉命將校以兵南畧壬子薦時果于太祖廟東幸八月庚申皇子舒嚕生告太祖廟辛巳布古德來

貢九月甲午詔修京城冬十月丁丑鐵驪來貢十一月
乙酉唐遣使來聘十二月甲寅朔祭太祖廟丙辰遣人
以詔賜唐盧龍軍節度使趙德鈞

七年春正月壬辰征西將軍科里遣伊喇多科奏軍事
己亥唐遣使來聘癸卯遣人使唐戊申祠木葉山二月
壬申拽刺迪里使吳越還吳越王遣使從獻寶器復遣
使持幣往報之三月己丑林牙迪离畢指斥乘輿囚之
丁未遣使諸國戊申上率羣臣朝于皇太后夏四月甲

戊唐遣使來聘致人皇王倍書己卯女直來貢五月壬
午朔幸祖州謁太祖陵六月戊辰御製太祖建國碑戊
寅烏古敵烈德來貢庚辰觀角觝戲秋七月辛巳朔賜
中外官吏物有差癸未賜高年布帛丙戌召羣臣耆老
議政壬辰唐遣使遺紅牙笙癸巳使復至懼報定州之
役也壬寅唐盧龍軍節度使趙德鈞遣人進時果丁未
薦新于太祖廟八月壬戌捕鵝于汭柳湖風雨暴至舟
覆溺死者六十餘人命存恤其家識以為戒戊辰林牙

迪离畢逸因復獲而鞫之知其事本誣構釋之九月庚子阻卜來貢冬十月乙卯唐遣使來聘己巳遣使雲中十一月丁亥遣使存問獲里國丁未阻卜貢海東青鶻三十連十二月辛亥以叛人泥离袞家口分賜羣臣丁巳西狩駐蹕平地松林

八年春正月戊子女直來貢庚子命皇太弟李胡左威衛上將軍撒剌率兵伐黨項癸卯上親餞之二月辛亥吐谷渾阻卜來貢乙卯剋實魯使唐還以附獻物分賜

羣臣三月辛卯皇太弟討黨項勝還宴勞之丙申唐遣

使請罷征黨項兵上以戰捷及黨項已聽命報之夏四

月戊午黨項來貢五月己丑獵獨牛山特哩袞達年所

乘內廐騮馬斃因名其山曰騮山戊戌如汧柳湖六月

甲寅準布來貢甲子回鶻阿爾斯蘭來貢秋七月戊寅

行納后禮癸未皇子特哩袞生丁亥鐵驪女直準布來

貢冬十月乙巳準布來貢丙午至自汧柳湖辛亥唐遣

使來聘己未遣巴拉使唐辛未烏爾古圖魯木來貢十

一月辛丑太皇太后崩遣使告哀于唐及人皇王貝唐
主嗣源殂子厚立十二月丁卯黨項來貢

九年春正月癸酉漁于土河丙申黨項貢駝鹿己亥南
京進白麋閏月戊午唐遣使告哀即日遣弟弔祭壬戌
東幸女直來貢二月壬申祠木葉山戊寅葬太皇太后
于德陵前二日發喪于殿塗殿上具衰服以送後追諡
宣簡皇后詔建碑于陵三月癸卯女直來貢夏四月唐
李從珂弒其主自立人皇王貝自唐上書請討五月甲

辰如沁柳湖癸丑女直來貢大星晝隕六月己巳朔布

古德來貢辛未唐李從厚謝弔祭所遣使初至闕秋八

月壬午自將南伐乙酉伊喇嘉哩手接飛鴈上異之因

以祭天地九月庚子西南星隕如雨乙卯次雲州丁巳

拔河陰冬十月丁亥畧地靈丘父老進牛酒犒師十一

月辛丑圍武州之陽城壬寅陽城降癸卯幹齊爾城降

括所俘丁壯籍于軍十二月壬辰皇子安巴薩哈勒生

皇后不豫是月駐蹕百湖之西南

十年春正月戊申皇后崩于行在二月戊寅百僚請加

追諡不許辛巳宰相尼嚕古謀南奔事覺執之三月戊

午黨項來貢夏四月吐谷渾酋長推勒伊德率衆內附丙

戌皇太后父族及母前夫之族二帳並為國舅以蕭默

色為尚父領之己丑錄囚五月甲午朔始製服行后喪

丙午葬于奉陵上自製文諡曰彰德皇后癸丑以錫里

王庭鶚為龍化州節度使六月乙丑托歡來貢辛未幸

頻布里淀秋七月乙卯獵納卜齊山冬十一月丙午幸

宏福寺為后飯僧見觀音畫像乃大聖皇帝應天皇后
及人皇王所施顧左右曰昔與父母兄弟聚觀于此歲
時未幾今我獨來悲嘆不已乃自製文題于壁以極追
感之意讀者悲之十二月庚辰如金瓶灤遣伊喇革格
科爾羅和囉木薩噶等捉生敵境

十一年春正月釣魚于土河庚申如潢河三月庚寅朔
女直來貢夏四月庚申謁祖陵戊辰還都謁太祖廟辛
未燕民之復業者陳汴州事宜癸酉女直諸部來貢癸

未賜回鶻使衣有差五月戊戌清暑泂柳湖六月戊午
布古德來貢乙酉吐谷渾來貢秋七月辛卯烏爾古來
貢壬辰佛古寧公主率三河烏爾古來朝丙申唐河東
節度石敬瑭為其主所討遣趙瑩因西南路招討羅卜
科求救上白太后曰李從珂弒君自立神人共怒宜行
天討時趙德鈞亦遣使至河東復遣桑維翰來告急遂
許興師八月己未遣蕭轄哩報河東師期丙寅吐谷渾
來貢庚午自將以援敬瑭九月癸巳有飛鷲自墜而死

南府額爾奇木和擒思得之以獻卜之吉上曰從珂自

滅之兆也丁酉入鴈門戊戌次忻州祀天地己亥次太

原庚子遣使諭敬瑭曰朕興師遠來當即與卿破賊會

唐將高行周符彥卿以兵來拒遂勒兵陳于太原及戰

佯為之却唐將張敬達楊光遠又陳于西未成列以兵

薄之而行周彥卿為伏兵所斷首尾不相救敬達光遠

大敗棄伏如山斬首數萬級敬達走保晉安寨額爾奇

木達魯與戰死之敬瑭率官屬來見上執手勞之癸卯

圍晉安甲辰以達魯子圖勒琿嗣為額爾奇木仍以父
字為名以旌其忠南宰相呼喇岱奚監軍伊聶濟將軍
布哈臨陳退懦上切責之冬十月甲子封敬瑄為晉王
幸其府敬瑄與妻李率其親屬捧觴上壽初圍晉安分
遣精兵守其要害以絕援兵之路而李從珂遣趙延壽
以兵二萬屯圍栢谷范延廣以兵二萬屯遼州幽州趙
德鈞以所部兵萬餘由上黨趨延壽軍合勢進擊知此
有備皆逗遛不進從珂遂將精騎三萬出次河橋親督

諸軍然知其不救。但日酣飲悲歌而已。丁卯召敬瑭至。行在所賜坐上。從容語之曰。吾三千里舉兵而來。一戰而勝。殆天意也。觀汝雄偉宏大。宜受茲南土。世為我藩輔。遂命有司設壇晉陽。備禮冊。命十一月丁酉冊敬瑭為大晉皇帝。自戊戌至戊申。候騎兩奏。南有兵至。復奏。西有兵至。命特哩袞達年幹拒之。敬達在圍八十餘日。內外隔絕。軍儲殆盡。至濯馬糞屑木以飼馬。馬飢自相啖。其驥尾死。則以充食。光遠等勸敬達出降。敬達曰。吾

有死而已爾欲降寧斬吾首以降閏月甲子揚光遠安
審琦殺敬達以降上聞敬達至死不變謂左右曰凡為
人臣當如此也命以禮葬所降軍士及馬五千匹以賜
晉帝丙寅祀天地以告成功庚午僕射蕭庫克齊奏趙
德鈞等諸援兵將遁詔夜發兵追擊德鈞等軍皆投戈
棄甲自相蹂踐擠于川谷者不可勝紀仍命皇太子馳
輕騎據險要追及步兵萬餘悉降之辛未兵度團栢谷
以酒肴祀天地俄追及德鈞父子乃率衆降次潞州召

諸將議皆請班師從之命南宰相吉琳呼喇岱奚監軍
伊聶濟將軍布哈先還壬申特哩衮幹林牙德勒賓來
獻俘晉帝辭歸上與宴酒酣執手約為父子以白貂裘
一廐馬二十戰馬千二百錢之命德勒賓將五千騎送
入洛臨別謂之曰朕留此候亂定乃還耳辛巳晉帝至
河陽李從珂窮蹙召人皇王貝同死不從遣人殺之乃
舉族自焚詔收其士卒戰歿者瘞之汾水上以為京觀
晉命桑維翰為文紀上功德十二月乙酉朔遣近侍塔

魯存問晉帝丙戌以晉安所獲分賜將校戊子遣使馳
奏皇太后及報諸道師還庚寅發太原辛卯聞晉帝入
洛遣郎君濟勒岱撫問壬辰次細河閱降將趙德鈞父
子兵馬戍戌次鴈門以沙太保所部兵分隸諸將庚戌
幸應州癸丑唐大同彰國振武三節度使迎見留之不
遣

十二年春正月丙辰次堆子口唐大同軍節度判官吳
巒閉城拒命遣崔廷勳圍其城庚申上親征至城下諭

之戀降辛酉射鬼箭于雲州北壬戌祀天地癸亥遣國

舅安圖發奚西部民各還本土丙寅皇太后遣侍衛舒

嚕趣行是夕率輕騎先進丁丑皇子舒嚕迎謁于灤河

告功太祖行宮戊寅朝于皇太后進珍玩為壽二月丁

亥以軍前所獲俘叛入幽州者皆斬之壬寅詔諸部休

養士卒癸卯晉遣唐所掠郎君埒克文班吏蕭岱爾還

朝三月庚申晉遣使來貢丁卯晉天雄軍節度使范延

廣潛遣人請內附不納己巳遣郎君達里庫穆爾德呼

使晉壬午晉使及諸國使來見夏四月甲申地震幸平
地松林觀潢水源五月甲寅幸頻蹕淀壬申震開皇殿
六月甲申晉遣戶部尚書聶延祚等請上尊號及歸鴈
門以北與幽薊之地仍歲貢帛三十萬疋詔不許庚戌
侍中羅索言范延廣叛晉引兵南向秋七月辛亥朔詔
諸部治兵甲癸丑幸懷州謁奉陵甲子晉遣使來告范
延廣反庚午遣耶律尼固呼使晉議軍事八月癸未晉
遣使復請上尊號不許庚寅晉及太原劉知遠南唐李

昇各遣使來貢庚子晉遣使以都汴及范延廣降來告
九月壬子布古德來貢庚申遣珠勒呼使晉及南唐癸
亥珠巴克姑女直來貢辛未遣使高麗鐵驪癸酉回鶻來
貢冬十月庚辰朔皇太后永寧節晉及回鶻燉煌諸國
皆遣使來賀壬午詔回鶻使呼爾察阿勒巴問其風俗
丁亥諸國使還就遣富勒呼皮室哈瑪爾使其國十一
月己未遣使求醫于晉丁卯鐵驪來貢十二月甲申東
幸祠木葉山癸丑醫來

--	--	--	--	--	--	--	--	--	--

15

16

17

遼史卷三

遼史卷三考證 太宗紀上

母淳欽皇后舒嚕氏 按舒嚕氏原本作蕭氏乃述律氏之訛義宗傳及章肅帝傳誤同今併改

天贊二年師次幽州符存審拒於州南縱兵邀擊大破之 按綱目唐莊宗同光元年閏四月契丹圍幽州考五代歐史符存審傳云莊宗遣存審分兵救之擊走契丹正太祖天贊二年事也此云縱兵邀擊大破之記載互異

天顯三年秋七月王都奏唐兵破定州塔拉死之尼嚕古扎拉等數十人被執 按尼嚕古之被執適當兵敗之時事在唐明宗天成三年至定州之破塔拉之死事在唐天成四年乃天顯四年事也考塔拉綱目五代史俱作托紐綱目唐天成四年二月唐王晏球克定州王都伏誅獲托紐送大梁斬之王晏球傳云晏球既大破契丹遂攻定州久之城中食盡都與托紐謀決圍以走不果都將馬讓能以城降都自焚死

亦在天成四年二月據此則當作王都奏唐擊敗定
州兵尼嚕古扎拉等數十人被執至唐兵破定州塔
拉死之宜書在四年二月下方為明晰今仍原文而
考訂之

四年五月癸酉謁二儀殿 原文訛作二祖殿據永樂
大典及南監本改

八月癸卯幸人皇王第 原文幸字上衍自字據南監
本刪

五年六月己亥射柳於行在 原文脫六月二字考遊
幸表射柳部族表達魯特來貢俱係六月紀以五月
統之計戊辰至己亥已三十二日則己亥上脫字無
疑今增

冬十月建太祖聖功碑于舒伊旺尼珠璉温 按太祖
紀作如迂王集會塢此又訛如廷正集會塢今畫一
譯改

十一年秋七月唐河東節度使石敬瑭遣趙瑩求救上

白太后河東復遣桑維翰來告急遂許興師 按資
治通鑑石敬瑭遣間使求救於契丹令桑維翰草表
據此則維翰草表求救未嘗親往考晉高祖本紀及
桑維翰傳皆無敬瑭遣維翰如契丹告急事

九月會唐將以兵來拒遂勒兵陳於太原 按綱目作
陳於虎北口考虎北口在今太原城汾水北

冬十月甲子封敬瑭為晉王十一月丁酉冊敬瑭為大
晉皇帝 按資治通鑑及五代歐史皆無先封晉王

事又按綱目契丹立石敬瑭為晉皇帝敬瑭割幽薊瀛莫涿檀順新媯儒武雲應寰朔蔚十六州以與契丹五代史晉紀與綱目合此紀於冊敬瑭為大晉皇帝下不載其事而書於會同元年十一月考幽涿檀薊順蔚等州五代史地理志俱屬盧龍時唐尚未亡趙德鈞方為盧龍軍節度使與敬瑭角立敬瑭即許賂契丹其勢未能盡割按之情事此紀為得其實

十二年春正月唐大同軍節度判官吳巒閉城拒命上

親征至城下諭之蠻降 按五代歐史吳蠻傳云蠻
清泰中為大同沙彥珣節度判官契丹還過雲州彥
珣出城迎謁為契丹所擄城中推蠻主州事蠻即閉
門拒守契丹以兵圍之高祖入立以雲州入於契丹
而蠻猶守城不下契丹圍之凡七月高祖義蠻所為
乃以書告契丹使解兵去召蠻為武寧軍節度副使
出帝時大同以蠻前守雲中不下遣蠻守貝州契丹
攻貝州城破投井死本紀會同七年亦載其事此云

蠻降紀載失實

九月遣珠勒呼使晉及南唐 按通鑑綱目五月吳與
契丹通使修好契丹主亦遣使報之即是役也蓋遼
使至江南知誥已僭位故不書吳而直書南唐耳

欽定四庫全書蒼要卷六千一百二十九

遼史卷四

元中書右丞相總裁托克托等修

本紀第四

太宗下

會同元年春正月戊申朔晉及諸國遣使來賀晉使且
言已命和凝撰聖德神功碑戊辰遣人使晉二月壬午
室韋進白廡戊子鐵驪來貢丁酉獵松山戊戌幸遼河

東丙午上思人皇王遣特哩袞率宗室以下祭其行宮

丁未增晉使所經供億戶三月壬戌將東幸三剋言農

務方興請減輜重促還期從之丙寅女直來貢癸酉東

幸夏四月戊寅朔如南京甲申女直來貢乙酉幸溫泉

己丑還宮朝于皇太后丁酉女直貢弓矢己亥西南邊

大詳袞即律羅卜科奏黨項捷五月甲寅晉復遣使請

上尊號從之六月丙子朔吐谷渾及女直來貢辛卯南

唐來貢癸巳詔建日月四時堂圖寫古帝王事于兩廡

秋七月癸亥遣使賜晉馬丁卯遣呼喇岱使晉摩哩拉

呼使南唐戊辰遣中臺省右相耶律蘇呼特爾格使晉

臨海軍節度使趙思溫副之冊晉帝為英武明義皇帝

八月戊子女直來貢庚子吐谷渾烏孫靺鞨皆來貢九

月庚戌黑車子室韋貢名馬邊臣奏晉遣守司空馮道

左散騎常侍韋勳來上皇太后尊號左僕射劉煦左諫

議大夫盧重上皇帝尊號遂遣監軍伊鼎濟充接伴壬

子詔羣臣及高年凡授大臣爵秩皆賜錦袍金帶白馬

金飾鞍勒著于令冬十月甲戌朔遣郎君特哩袞等撫
問晉使壬寅晉遣使來謝冊禮復有使來進獨峯駝及
名馬十一月甲辰朔命南北宰相及額爾奇木就館賜
晉使馮道以下宴丙午上御開皇殿召見晉使壬子皇
太后御開皇殿馮道韋勳冊上尊號曰廣德至仁昭烈
崇簡應天皇太后甲子行再生柴冊禮丙寅皇帝御宣
政殿劉煦盧重冊上尊號曰睿文神武法天啓運明德
章信至道廣敬昭孝嗣聖皇帝大赦改元會同是月晉

復遣趙瑩奉表來賀以幽薊瀛莫涿檀順媽儒新武雲
應朔寰蔚十六州并圖籍來獻於是詔以皇都為上京
府曰臨潢升幽州為南京南京為東京改新州為奉聖
州武州為歸化州升北南院及伊實額爾奇木為王以
王簿為令令為刺史刺史為節度使二部特哩袞為司
徒達爾罕為副使瑪達布為縣令縣達爾罕為馬步置
宣徽閣門使控鶴客省御史大夫中丞侍御判官文班
牙署諸宮院實珠馬羣約尼實珠南北府國舅帳郎君

官為敝史諸部宰相節度使帳為司空二室韋達林為
僕射鷹坊監治等局官長為詳果十二月戊戌遣通古
阿巴等使晉制加晉馮道守太傅劉煦守太保餘官各
有差

二年春正月乙巳以受晉冊遣使報南唐高麗丁未御
開皇殿宴晉使馮道以下賜物有差戊申晉遣金吾衛
大將軍馬從斌考功郎中劉知新來貢珍幣命分賜羣
臣丙辰晉遣使謝免沿邊四州錢幣二月戊寅宴諸王

及節度使賀受冊禮者仍命皇太子特哩袞達年餞之

癸巳謁太祖廟賜在京吏民物及內外羣臣官賞有差

丁酉加蕙侍中左金吾衛上將軍王劭檢校太尉三月

改于裏潭之側戊申女直來貢丁巳封皇子舒魯為壽

安王雅斯哈為太平王己巳大賚百姓夏四月乙亥幸

木葉山癸巳東京路奏狼食人五月乙巳禁南京鬻北

羊出境薩納噶多囉等坐盜官物籍其家南唐遣使來

貢丁未以所貢物賜羣臣戊申回鶻單于使人乞授官

詔第加刺史縣令六月丁丑雨雪是夏駐蹕頻蹕浚秋
七月戊申晉遣使進犀帶庚戌吐谷渾來貢乙卯敕史
阿巴坐奉使失職命笞之閏月癸未伊實大王坐賦調
不均以木劔背撻而釋之并罷南北府民上供及宰相
節度賦役非舊制者乙酉遣迪里賜晉烏爾古良馬已
丑以南王府二刺史貪蠹各杖一百仍繫虞候帳備射
鬼箭選羣臣為民所愛者代之八月乙丑晉遣使貢歲
幣奏輸戊亥二歲金幣于燕京九月甲戌準布阿勒達

來貢已卯遣使使晉冬十月丁未上以烏爾古部水草
肥美詔北南院徙三錫林戶居之十一月丁亥鐵驪燉
煌遣使來貢十二月庚子釣魚于土河甲子回鶻使者
僣人有以刃相擊者詔付其使處之

三年春正月戊子吳越王遣使來貢庚寅人皇王妃來
朝回鶻使乞觀諸國使朝見禮從之壬辰遣陪謁阿巴
使晉致生辰禮晉以并鎮忻代之吐谷渾來歸二月己
亥奚王魯古蘂率六節度使朝貢庚子烏爾古獻伏鹿

國俘賜其部額爾奇木旗鼓以旌其功壬寅女直來貢

辛亥摩哩拉呼摩哩使回鶻阿爾斯蘭還賜對衣勞之

乙卯鴨綠江女直遣使來覲三月戊辰遣使使晉報幸

南京己巳如南京辛未命特哩袞努呀克特率萬騎先

驅壬申次石嶺以奚王魯古孛監軍伊聶濟朝謁不時

責之丙子羅卜科上黨項俘獲數癸未獵水門獲白鹿

庚寅詔扈從擾民者從軍律甲午幸薊州乙未晉及南

唐各遣使來覲夏四月庚子至燕備法駕入自拱辰門

御元和殿行入閣禮壬寅遣人使晉乙巳幸留守趙延壽別墅丙午晉遣宣徽使楊端王眺等來問起居壬子

御便殿宴晉及諸國使丙辰晉遣使進茶藥壬戌御昭慶殿宴南京羣臣癸亥晉遣使賀端午以所進節物賜

羣臣乙丑南唐進白龜五月庚午以端午宴羣臣及諸國使命回鶻燉煌二使作本俗舞俾諸使觀之庚辰晉遣使進弓矢甲申遣皇子天德及檢校司徒邸用和使

晉戊子閱騎兵于南郊六月乙未朔東京宰相耶律伊

濟言渤海相大素賢不法詔僚佐部民舉有才德者代之丙申閱步卒于南郊庚子晉及錫爾固勒濟遣使來見壬寅發燕京命中書令蕭僧隱部諸道軍于長坐營癸丑次奉聖州甲寅勞軍士秋七月己巳獵哈達拉山癸酉朝于皇太后丙子從皇太后視人皇王妃疾戊寅人皇王妃蕭氏薨己卯以安重榮據鎮州叛晉詔征南將軍柳巖邊備丙戌徙人皇王行宮于其妃薨所辛卯晉遣使請行南郊禮許之八月己亥詔東丹吏民為其

王倍妃蕭氏服庚子準布來貢壬寅遣使南唐乙巳準

布黑車子室韋埒里等國來貢南唐遣使求青氊帳賜

之戊申以安圖私城為白川州辛亥布古德使乞賜爵

以其國相授之甲寅準布來貢乙卯置白川州官屬丙

辰詔以伊奇哩河臚胸河近地給賜南院鄂律圖嚕伊

遜巴勒北院烏納哈喇三錫林人為農田九月庚午侍

中崔窮古言晉主聞陛下數游獵意請節之上曰朕之

畋獵非徒從樂所以練習武事也乃詔諭之壬午邊將

奏破吐谷渾擒其長詔止誅其首惡及其丁壯餘並釋
之丙戌晉遣使貢名馬戊子直及吳越王遣使來貢
冬十月辛丑遣剋朗使吳越魯庫使南唐庚申晉遣使
貢布及請親祠南嶽從之十一月己巳南唐遣使奉蠟
丸書言晉密事丁丑詔有司教民播種紡績除娣亡妹
續之法十二月壬辰朔率百僚謁太祖行宮甲午燔柴
禮畢祠于神帳丙申遣使使晉丙辰詔契丹人授漢官
者從漢儀聽與漢人婚姻丁巳詔燕京皇城西南堞建

涼殿是冬駐蹕于繖浞

四年春正月壬戌以伊實彭布托果三部鰥寡不能自
存者官為之配丙子南唐遣使來貢庚辰納拉威部來
獻黨項俘獲數已丑詔定征黨項功二月丙申皇太子
獲白麀甲辰晉遣使進香藥丙午鐵驪來貢丁巳詔有
司編述始祖奇善汗事迹己未晉遣楊彥詢來貢且言
鎮州安重榮跋扈狀遂留不遣是月晉鎮州安重榮執
遼使者伊喇三月特授回鶻使科里裕悅并賜旌旗弓

劔衣馬餘賜有差癸酉晉以許祀南郊遣使來謝進黃金十鎰夏四月己卯晉遣使進櫻桃五月庚辰吐谷渾額爾奇木蘇等叛入晉遣德呼諭晉及太原守臣六月辛卯振武軍節度副使趙崇逐其節度使耶律華喇以朔州叛附晉丙午命宣徽使宜古察赴朔州以兵圍其城有晉使至請開壁即勿聽驛送闕下秋七月癸亥南唐遣使奉蠟丸書丙寅尼古察奏晉遣使至朔令降守者猶堅壁弗納且言晉有貢物命即以所貢物賜攻城

將校已巳有司奏神燾車有蜂巢成蜜史占之吉壬申
晉遣使進水晶硯八月癸巳南唐奉蠟丸書庚子晉遣
使進犀弓竹矢吳越王遣使奉蠟丸書九月壬申有星
孛于晉分丁丑幸歸化州冬十月辛丑有司奏燕薊大
熟癸卯吳越王遣使來貢十一月丙寅晉以討安重榮
來告庚午吐谷渾請降遣使撫諭準布來貢以其物賜
左右丙子鴨綠江女直來貢壬午以永寧天授二節及
正旦重午冬至臘並受賀著令十二月戊子晉遣使來

告山南節度使安從進反詔以便宜討之庚寅南唐遣使奉蠟丸書戊戌晉遣王升鸞來貢戊申晉以敗安重榮來告遂遣楊彥詢歸辛亥晉遣使乞罷戍兵詔特哩袞碩格班師甲寅拔朔州遣控鶴指揮使轄哩勞軍時尼古察戰歿城下上怒命誅城中丁壯仍以叛民上戶三十為尼古察部曲

五年春正月丙辰朔上在歸化州御行殿受羣臣朝以諸道貢物進太后及賜宗室百僚戊午詔求直言北王

府郎君耶律哈斯應詔召對稱旨特授宣徽使詔政事
令僧隱等以契丹戶分屯南邊戊辰晉函安重榮首來
獻上數欲親討重榮至是乃止癸酉遣使使晉是月晉
以朔州平遣使來賀遂遣客省使耶律華格使晉并致
生辰禮二月壬辰上將南幸以諸路有未平者召太子
及羣臣議皆曰今襄鎮朔三州雖已平然吐谷渾為安
重榮所誘猶未歸命宜發兵討之以警諸部上曰正與
朕意合遂下詔以明王溫代裕悅新為西南路招討使

以討之且諭明王宜先練習邊事而後之官甲午如南
京遣使使晉索吐谷渾叛者乙未布古德來貢三月乙
卯朔晉遣齊州防禦使宋暉業翰林茶酒使張言來問
起居閏月駐蹕陽門夏四月甲寅朔鐵驪來貢以其物
分賜羣臣丙子晉遣使進射柳鞍馬五月五日戊子禁
屠宰六月癸丑晉齊王重貴遣使來貢丁巳托克托呼
蘇色來貢乙丑晉王敬瑭殂子重貴立戊辰晉遣使告
哀輟朝七日庚午遣使往晉弔祭丁丑聞皇太后不豫

上馳入侍湯藥必親嘗仍告太祖廟幸菩薩堂飯僧五萬人七月乃愈秋七月庚寅晉遣金吾衛大將軍梁言判四方館事朱崇節來謝書稱孫不稱臣遣客省使喬榮讓之景延廣答曰先帝則聖朝所立今主則我國自冊為鄰為孫則可奉表稱臣則不可榮還奏上始有南伐之意辛卯準布布古德烏爾古來貢將軍當達里布爾古等率降將希達至闕并獻所獲丁未晉遣使以祖母哀來告八月辛酉女直準布烏爾古貢方物甲子晉

復襄州戊辰詔河東節度劉知遠送叛臣烏爾古指揮
使由燕京赴闕癸酉遣天城軍節度使蕭拜牲弔祭于
晉九月壬辰遣使賀晉帝嗣位冬十月己巳徵諸道兵
遣將軍默赫特伐黨項十一月己未武定軍奏松生棗
十二月癸亥晉遣使來謝是冬駐蹕赤城

六年春二月乙卯晉遣使進先帝遺物辛酉晉遣使請
居汴從之三月己卯朔吳越王遣使來貢甲申穆爾托
音來歸戊子南唐遣使奉蠟丸書丁未晉至汴遣使來

謝夏四月戊申朔日有食之五月己亥遣使如晉致生
辰禮六月丁未朔鐵驪來貢己未奚楚庫勒部進白麝
辛酉莫州進白鶻晉遣使貢金秋八月丁未朔晉復貢
金己未如奉聖州晉遣其子延煦來朝冬十一月辛卯
上京留守耶律達年得晉諜知有二心甲辰鐵驪來貢
十二月丁未如南京議伐晉命趙延壽趙延昭安圖解
里等由滄恒易定分道而進大軍繼之是歲楊產昭請
移鎮柰灤及新鎮從之

七年春正月甲戌朔趙延壽延昭率前鋒五萬騎次任丘丙子安圖入鴈門圍忻代己卯趙延壽圍貝州其軍校邵珂開南門納遼兵太守吳繼投井死己丑次元城授延壽魏博等州節度使封魏王率所部屯南樂丙申遣兵攻黎陽晉張彥澤來拒辛丑晉遣使來修舊好詔割河北諸州及遣桑維翰景延廣來議二月甲辰攻博州刺史周儒以城降晉平盧軍節度使楊光遠密道遼師自馬家口濟河晉將景延廣命石斌守麻家口白再

榮守馬家口未幾周儒引遼軍滿達營于河東攻鄆州

北津以應光遠晉遣李守貞皇甫遇梁漢璋薛懷讓將

兵萬人緣河水陸俱進遼軍圍晉別將于戚城晉主自

將救之遼師解去守貞等至馬家口滿達遣步卒萬人

築營壘騎兵萬人守於外餘兵屯河西渡未已晉兵薄

之遼軍不利三月癸酉朔趙延壽言晉諸軍沿河置柵

皆畏却不敢戰若率大兵直抵澶淵據其橋梁晉必可

取是日晉兵駐澶淵其前軍高行周在戚城乃命延壽

延昭以數萬騎出行周右上以精兵出其左戰至暮上

復以勁騎突其中軍晉軍不能戰會有諜者言晉軍東

面數少沿河城柵不固乃急擊其東偏衆皆奔潰縱兵

追及遂大敗之壬午留趙延昭守貝州徙所俘戶于內

地夏四月癸丑還次南京辛未如涼陘五月癸酉耶律

巴哩岱奏破德州擒刺史尹居藩及將吏二十七人六

月甲辰黑車子室韋來貢乙巳實默里約囉等國來貢

秋七月己卯晉楊光遠遣人奉蠟丸書辛卯晉遣張暉

奉表乞和留暉不遣八月辛酉回鶻遣使請婚不許是

月晉鎮州兵來襲飛狐大同軍節度使耶律恭嗜戰敗
之九月庚午朔北幸十月丁未布古德來貢壬戌天授
節諸國進和惟晉不至十一月壬申詔徵諸道兵以閏
月朔會溫榆河北十二月癸卯南伐甲子次古北口閏
月己巳朔閱諸道兵於溫榆河己卯圍恒州下其九縣
八年春正月庚子分兵攻邢洛磁三州殺掠殆盡入鄴
都境張從恩馬全節安審琦兵悉陳于相州安陽水之

南皇甫遇與濮州刺史慕容彥超將兵千騎來覘遼軍
至鄴都遇遼軍數萬且戰且却至榆林店遼軍繼至遇
與彥超力戰百餘合遇馬斃步戰審琦引騎兵踰水以
救遼軍乃還二月圍魏晉將杜重威率兵來救彥超子晉
將折從阮陷滕州三月戊戌師拔祁州殺其刺史沈斌
庚戌杜重威李守貞攻秦州戊午趙延壽率前鋒薄秦
城己未重威守貞引兵南遁追至陽城大敗之復以步
卒為方陣來拒與戰二十餘合壬戌復搏戰十餘里癸

亥圍晉兵於白團衛村晉兵下鹿角為營是夕大風至
曙命鐵鷄軍下馬拔其鹿角奮短兵入擊順風縱火揚
塵以助其勢晉軍大呼曰都招討何不用兵令士卒徒
死諸將皆奮出戰張彥澤藥元福皇甫遇出兵大戰諸
將繼至遼軍却數百步風益甚晝晦如夜符彥卿以萬
騎橫擊遼軍率步卒並進遼軍不利上乘奚車退十餘
里晉追兵急獲一橐駝乘之乃歸晉兵退保定州夏四
月甲申還次南京杖戰不力者各數百庚寅宴將士於

元和殿癸巳如涼陁六月戊辰回鶻來貢辛未吐谷渾

布古德皆來貢辛巳黑車子室韋來貢丁亥趙延壽奏

晉兵襲高陽戍將擊走之秋七月乙卯獵平地松林晉

遣孟守中奉表請和仍以前事荅之八月己巳詔侍衛

蕭蘇色閱羣牧于北陁九月壬寅次赤山宴從臣問軍

國要務對曰軍國之務愛民為本民富則兵足兵足則

國強上以為然辛酉還上京冬十月辛未祠木葉山十

一月戊戌女直鐵驪來貢十二月癸亥朔朝謁太祖行

宮乙丑雲州節度使耶律恭嗜獲晉謀者戊辰臘賜諸國貢使衣馬

九年春正月庚子回鶻來貢丁未女直來貢二月戊辰布古德奏軍籍三月己亥吐谷渾遣軍校蘇嗜獻生口丁戶授蘇嗜檢校司空夏四月辛酉朔吐谷渾白可久來附是月如涼陁五月庚戌晉易州戍將孫方簡請內附六月戊子謁祖陵更闕神殿為長思秋七月辛亥詔徵諸道兵故傷禾稼者以軍法論癸丑女直來貢乙卯

以準布酋長哈喇為本部額爾奇木八月丙寅烏爾古
來貢是月自將南伐九月壬辰閱諸道兵于漁陽西棗
林浞趙延壽與晉張彥澤戰于定州敗之十一月戊子
朔進圍鎮州丙申先遣候騎報晉兵至遣精兵斷河橋
晉兵退保武強南院大王達年將軍高模翰分兵由瀛
州間道以進杜重威遣貝州節度使梁漢璋率衆來拒
與戰大敗之殺梁漢璋杜重威張彥澤引兵據中渡橋
趙延壽以步卒前擊高彥溫以騎兵乘之追奔逐北殪

屍數萬斬其將王清采產筠墮水死重威等退保中渡寨義武軍節度使李殷以城降遂進兵夾漳沱而營去中渡寨三里分兵圍之夜則列騎環守晝則出兵抄掠命大內特哩袞耶律舒庫爾及趙延壽分兵圍守自將騎卒夜渡河出其後攻下欒城降騎卒數千分遣將士據其要害下令軍中預備軍食三日不得舉煙火但獲晉人即黥而縱之諸饋運見者皆棄而走於是晉兵內外隔絕食盡勢窮十二月丙寅杜重威李守貞張彥澤

等率所部二十萬衆來降上擁數萬騎臨大阜立馬以受之授重威守太傅鄴都留守守貞天平軍節度使餘各領舊職分降卒之半付重威半以隸趙延壽命御史大夫嘉哩監軍富珠哩張彥澤持詔入汴諭晉帝母李氏以安其意且召桑維翰景延廣先來留騎兵千人守魏自率大軍而南壬申嘉哩等至汴晉帝重貴素服拜命與母李氏奉表請罪初重貴絕和好維翰數諫止之不從至是彥澤殺維翰給言自經死詔收葬之復其田

園地宅仍厚恤其家甲戌彥澤遷重貴及其母若妻於
開封府署以控鶴指揮使李榮督兵衛之壬午次赤岡
重貴舉族出封丘門橐索牽羊以待上不忍臨視命改
館封禪寺晉百官縞衣紗帽俯伏待罪上曰其主負恩
其臣何罪命領職如故即授安叔千金吾衛上將軍叔
千出班獨立上曰汝邢州之請朕所不忘乃加鎮國軍
節度使蓋在邢嘗密請內附也將軍康祥執景延廣來
獻詔以牙籌數其罪凡八繫送都道自殺

大同元年春正月丁亥朔備法駕入汴御崇元殿受百
官賀戊子以樞密副使劉敏權知開封府殺秦繼旻李
彥紳及鄭州防禦使楊承勳以其弟承信為平盧軍節
度使襲父爵初楊光遠在青州求內附其子承勳不聽
殺其判官丘濤及弟承祚等自歸于晉故誅之己丑以
張彥澤擅徙重貴開府殺桑維翰縱兵大掠不道斬於
市晉人鬻食之辛卯降重貴為崇祿大夫檢校太尉封
負義侯癸巳以張礪為平章事晉李崧為樞密使馮道

為太傅和凝為翰林學士趙瑩為太子太保劉煦守太

保馮玉為太子少保癸卯遣趙瑩馮玉李彥韜將三百

騎送負義侯及其母李氏太妃安氏妻馮氏弟重睿子

延煦延寶等于黃龍府安置仍以其宮女五十人內官

三人東西班五十人醫官一人控鶴四人庖丁七人茶

酒司三人儀鸞三人健卒十人從之二月丁巳朔建國

號大遼大赦改元大同升鎮州為中京以趙延壽為大

丞相兼政事令樞密使中京留守中外官僚將士爵賞

有差辛未河東節度使北平王劉知遠自立為帝國號
漢詔以耿崇美為昭義軍節度使高唐英為昭德軍節
度使崔廷勳為河陽軍節度使分據要地三月丙戌朔
以蕭翰為宣武軍節度使賜將吏爵賞有差壬寅晉諸
司僚吏嬪御宦寺方技百工圖籍歷象石經銅人明堂
刻漏太常樂譜諸宮縣鹵簿法物及鎧仗悉送上京磁
州帥梁暉以相州降漢己酉命高堂英討之夏四月丙
辰朔發自汴州以馮道李崧和凝李濟徐台符張礪等

從行次赤岡夜有聲如雷起於御幄大星復隕於旗鼓
前乙丑濟黎陽渡顧謂侍臣曰朕此行有三失縱兵掠
芻粟一也括民私財二也不遽遣諸節度還鎮三也皇
太弟遣使問軍前事上報曰初以兵二十萬降杜重威
張彥澤下鎮州及入汴視其官屬具員者省之當其才
者任之司屬雖存官吏廢墮猶雛飛之後徒有空巢久
經離亂一至於此所在盜賊屯結土功不息餽餉非時
民不堪命河東尚未歸命西路酋帥亦相黨附夙夜以

思制之之術惟推心庶僚和協軍情撫綏百姓三者而

已今所歸順凡七十六處得戶一百九萬百一十八非

汴州炎熱水土難居止得一年太平可指掌而致且改

鎮州為中京以備巡幸欲伐河東姑俟別圖其槩如此

戊辰次高邑不豫丁丑崩于欒城年四十六是歲九月

壬子朔葬于鳳山陵曰懷陵廟號太宗統和二十六年

七月上尊諡孝武皇帝重熙三十一年九月增諡孝武

惠文皇帝

贊曰太宗甫定多方遠近向化建國號備典章至於釐庶政閱名實錄囚徒教耕織配鰥寡求直言之士得郎君哈斯即擢宣徽嘉唐張敬達忠於其君卒以禮葬輟遊豫而納三剋之請憫士卒而下休養之令親征晉國重貴面縛斯可謂威德兼宏英畧間見者矣入汴之後無幾微之驕有三失之訓傳稱鄭伯之善處勝書進秦誓之能悔過太宗蓋兼有之其卓矣乎

遼史卷四

遼史卷四考證 太宗紀下

會同元年二月丙午 丙午原本作丙申按丙申應在
丁酉戊戌之上據下文丁未考之當係丙午今改正
夏四月耶律羅卜科奏黨項捷 羅卜科原本作魯不
古列傳同此與卷三之盧不姑本卷後之魯不姑係
一人而音轉歧誤今併改為羅卜科

十一月丙寅改元會同 按此為天顯十二年十一月
事五代歐史載契丹改天顯十一年為會同元年係

誤

二部特哩袞為司徒 特哩袞原本作梯里已按本史
百官志惕隱亦曰梯里已今併改為特哩袞

四年二月丙午 丙午原本作丙子按上正月書丙子
則二月不得復有丙子以上甲辰下丁巳計之應係
丙午今據永樂大典改

秋七月尼固察奏晉遣使至朔令降 原本晉訛請今
據永樂大典改

五年春正月晉以朔州平遣使來賀 原本遣訛請今
據永樂大典改

三月晉遣齊州防禦使宋暉業來問起居 按宋暉業
五代薛史作宋光鄴此避太宗諱

五月五日戊子 戊子原本作戊午以上四月甲寅朔
考之則五月五日應係戊子今據永樂大典改

秋七月晉遣判四方館事朱崇節來謝 朱崇節按五

代史作宋崇節

十一月己未 按本史歷象志是年十一月係辛巳朔
計辛巳距己未三十九日十一月內不應有己未日
係誤

八年三月戊午 戊午原本作戊子按三月內不應有
戊子以上庚戌下己未計之應係戊午今改正

九年五月晉易州戍將孫方簡請內附 孫方簡按五
代歐史作孫方諫

十一月先鋒候騎報晉兵至 先鋒原本作先遣據永

樂大典改

杜重威遣貝州節度使梁漢璋率衆來拒 貝州節度
使原本作其將節度使據永樂大典改

宋彥筠墮水死 按資治通鑑載晉兵與契丹夾滹沱
而軍晉軍爭橋不勝杜重威遣王清與宋彥筠俱進
清戰甚銳契丹以新兵繼之清及士卒皆死彥筠戰
敗浮水抵橋得免冊府元龜載王清從杜重威北征
至中渡橋清為先鋒開橋奪路重威遣宋彥筠與俱

彥筠尋退走清酣戰不息與其下俱沒焉五代歐史亦書彥筠退走王清力戰而死又按通鑑是年十二月契丹遙以兵環晉營軍中食盡杜重威與李守貞宋彥筠謀降契丹又按陶岳五代史補云後漢乾祐中宋彥筠為鄭州節度使據此則王清戰死而宋彥筠之未死明矣此書彥筠墮水死蓋當時因其墮水遂誤以為死耳

監軍富珠哩 原本作傅桂兒他卷又作傅往兒今據五

代歐史併改

大同元年春正月降重貴為崇祿大夫 按五代薛史
作光祿大夫此避太宗諱

太妃安氏 原本缺太字安字今據永樂大典增

欽定四庫全書卷六千一百三十

遼史卷五

元中書右丞相總裁托克托等修

本紀第五

世宗

世宗孝和莊憲皇帝諱阮小字烏雲讓國皇帝長子母柔貞皇后蕭氏帝儀觀豐偉內寬外嚴善騎射樂施予人望歸之太宗愛之如子會同九年從伐晉大同元年

二月封永康王四月丁丑太宗崩於藥城戊寅梓宮次鎮陽即皇帝位於柩前甲申次定州命天德碩格嘉哩等護梓宮先赴上京太后聞帝即位遣太弟魯呼率兵拒之六月甲寅次南京五院額爾奇木安圖詳袞瑠格遣人馳報請為前鋒至泰德泉遇魯呼軍戰敗之上遣郎君勤德等詣兩軍諭解秋閏七月次潢河太后魯呼整兵拒於橫渡相持數日用烏哲之謀各罷兵趨上京既而聞太后魯呼復有異謀遷于祖州誅司徒華沙及

春博里八月壬午朔尊母蕭氏為皇太后以太后族拉翼戴功臣及北院大王翰南院大王吼各五十安圖楚補各百德呼塔喇子孫先以非罪籍沒者歸之癸未始置北院樞密使以安圖為之九月壬子朔葬嗣聖皇帝於懷陵丁卯行柴冊禮羣臣上尊號曰天授皇帝大赦改大同元年為天祿元年追諡皇考曰讓國皇帝以安圖主東丹國封明王察克為泰寧王瑠格為特哩袞高勲為南院樞密使

二年春正月天德蕭翰瑠格瓚都等謀反誅天德杖蕭翰遷瑠格於邊罰瓚都使哈噶斯國漢主劉知遠殂子承祐立夏四月庚辰朔南唐遣李朗王祚來慰且賀兼奉蠟丸書議攻漢秋七月壬申皇子賢生冬十月壬午南京留守魏王趙延壽薨以中臺省右相德呼為南京留守封燕王十一月駐蹕彰武南

三年春正月蕭翰及公主額伯哩謀反翰伏誅額伯哩瘦死獄中庚申肆赦內外官各進一階夏六月戊寅以

敝史耶律胡爾錦為北院大王己卯特哩袞托雲封漆
水郡王秋九月辛丑召羣臣議南伐冬十月遣諸將率
兵攻下貝州高老鎮狗地鄴都南宮堂陽殺深州刺史
史萬山俘獲甚衆

四年春二月辛未泰寧王察克來朝留侍是月建政事
省三月戊戌朔南唐遣趙延嗣張福等來賀南征捷秋
九月乙丑朔如山西冬十月自將南伐攻下安平內丘
東鹿等城大獲而還是歲冊皇后蕭氏

五年春正月癸亥朔如百泉湖漢郭威弒其主自立國號周遣朱憲來告即遣使致良馬漢劉崇自立於太原二月周遣姚漢英華昭胤來以書辭抗禮留漢英等夏五月壬戌朔太子太傅趙瑩薨輟朝一日命歸葬于汴詔州縣錄事叅軍主簿委政事省銓注六月辛卯朔劉崇為周所攻遣使稱姪乞援且求封冊即遣燕王德呼樞密使高勳冊為大漢神武皇帝南唐遣蔣洪來乞舉兵應援是夏清暑百泉嶺九月庚申朔自將南伐壬戌

次歸化州尚和山癸亥祭讓國皇帝于行宮羣臣皆醉
察克反帝遇弒年三十四應歷元年葬於顯州西山陵
曰顯陵二年諡孝和皇帝廟號世宗統和二十六年七
月加謚孝和莊憲皇帝

贊曰世宗中才之主也入繼大統曾未三年納唐丸書
即議南伐既乏持重宜乖周防蓋有致禍之道矣然而
孝友寬慈亦有君人之度焉未及師還變起沉酒豈不
可哀也哉


遼史卷五

遼史卷五考證 世宗紀

天祿五年遣燕王德呼樞密使高勳冊為大漢神武皇帝 德呼原本作牒螭按資治通鑑十四春秋皆作述軋今從牒螭譯改



遼史卷五考證



總校官原候補知府臣葉佩蓀

校對官編修臣吳錫麒

謄錄監生臣孫樹新

欽定四庫全書會要

史部
遼史卷六至
十二

詳校官祭酒
臣
韋謙恒



欽定四庫全書蒼要卷六千一百三十一

遼史卷六

元中書右丞相總裁托克托等修

紀第六

穆宗

穆宗孝安敬正皇帝諱璟小字舒嚕太宗皇帝長子母曰靖安皇后蕭氏會同二年封壽安王天祿五年九月癸亥世宗遇害逆臣察克等伏誅丁卯即皇帝位羣臣

上尊號曰天順皇帝改元應歷戊辰如南京是月遣劉承訓告哀于漢冬十一月漢周南唐各遣使來弔乙亥詔朝會依嗣聖皇帝故事用漢禮十二月甲辰漢遣使獻弓矢鞍馬壬子鐵驪布古德皆來貢

二年春正月戊午朔南唐遣使奉蠟丸書及進犀兕甲萬屬壬戌太尉郭勣濟謀逆伏誅二月癸卯女直來貢三月癸亥南唐遣使奉蠟丸書丁卯復遣使來貢甲申以耶律特烈為南院大王夏四月丙戌朔日有食之己

亥鐵驪進鷹鷂五月丙戌朔視朝壬午南唐遣使來貢

六月壬辰國舅政事令蕭默赫特宣政殿學士李澣等

謀南莽事覺詔暴其罪乙未祭天地壬寅漢為周所侵

遣使求援命中臺省右相高模翰赴之丁未命乳媪之

兄赫魯世為阿克蘇錫林額爾奇木秋七月乙亥政事

令婁陵魯呼子完郎君扎幹迪里謀反事覺辭逮太平

王雅斯哈林牙華格郎君錫倫等皆執之十一月辛丑

謚皇太后曰貞烈葬祖陵漢遣使來會冬駐驛奉聖州

以南京水詔免今歲租

四年春正月戊寅回鶻來貢己丑華格扎幹等伏誅完
及雅斯哈皆釋之是月周主威殂養子晉王柴榮嗣立
二月丙午朔周攻漢命政事令耶律達魯授之丙辰漢
遣使進茶藥幸南京夏五月乙丑忻代二州叛漢遣南
院大王特烈助達魯討之丁酉特烈敗周將符彥卿於
忻口六月癸亥特烈獻所獲秋七月乙酉漢民有為遼
軍誤掠者遣使來請詔悉歸之九月丙申漢為周人所

侵遣使來告冬十一月彰國軍節度使蕭迪里太保許
從贊奏忻代二州捷十二月辛酉朔謁祖陵庚午漢遣
使來貢是冬駐蹕杏峒

五年春正月辛未布古德來貢二月庚子朔日有食之
庚申漢遣使請上尊號不許壬戌如裏潭夏四月己酉
周侵漢漢遣使求援癸丑郎君蕭哈里世為北府宰相
秋九月庚辰漢主有疾遣使來告冬十月壬申女直來
貢丁亥謁太宗廟庚寅南唐遣使來貢十一月乙未朔

漢主崇殂子承鈞遣使來告且求嗣立遣使弔祭遂封冊之十二月乙丑朔謁太祖廟辛巳漢遣使來議軍事

六年夏五月丁酉謁懷陵六月甲子漢遣使來議軍事秋七月不視朝九月戊午謁祖陵冬十一月壬寅布古德來貢十二月己未朔謁太祖廟

七年春正月庚子布古德來貢二月辛酉南唐遣使奉蠟丸書辛未駐蹕潢河夏四月戊午朔還上京初女巫

錫庫上延年藥方當用男子膽和之不數年殺人甚多
至是覺其妄辛巳射殺之五月辛卯漢遣使來貢六月
丙辰周遣使來聘南唐遣使來貢八月己未周遣使來
聘是秋不聽政冬十月庚申獵于七鷹山十二月丁巳
詔大臣曰有罪者法當刑朕或肆怒濫及無辜卿等切
諫無或面從辛巳還上京

八年春二月乙丑駐蹕黃河夏四月甲寅南京畱守蕭
思溫攻下沿邊州縣遣人勞之五月周陷東城縣六月

辛未蕭思溫請益兵乞駕幸燕秋七月獵于伊喇山迄于九月射鹿諸山不視朝冬十一月辛酉漢遣使來告周復來侵乙丑使再至十二月庚辰又至

九年春正月戊辰駐蹕黃河夏四月丙戌周來侵戊戌以南京畱守蕭思溫為兵馬都總管擊之是月周拔益津瓦橋淤口三關五月乙巳朔陷瀛莫二州癸卯如南京辛未周兵退六月乙亥朔視朝戊寅復容城縣庚申西幸如懷州是月周主榮殂子宗訓立秋七月發南京

軍戍范陽冬十二月戊寅還上京庚辰王子迪里前宣
徽使哈斯蕭達爾罕等謀反事覺鞠之辛巳祀天地祖
考告逆黨事敗丙申召羣臣議時政

十年春正月周殿前都點檢趙匡胤廢周自立建國號
宋夏五月乙巳謁懷陵壬子漢以潞州歸附來告丙寅
至自懷陵六月庚申漢以宋兵圍石州來告遣大同軍
節度使阿拉率四部往援詔蕭思溫以三部兵助之秋
七月己亥朔宋兵陷右州潞州復叛漢使來告辛酉政

事令耶律壽遠太保綽卜鄂博等謀反伏誅以酒脯祀
天地于黑山八月如秋山幸懷州庚午以鎮茵石後復
擊殺近侍古格冬十月丙子魯呼子喜隱謀反辭連魯
呼下獄死十一月哈斯獄中上書陳便宜

十一年春二月丙寅釋喜隱辛亥司徒烏埒濟子特爾
格誣告其父謀反復詐乘傳及殺行人以其父請枝而
釋之丙辰蕭思溫奏老人星見乞行赦宥閏月甲子如
黃河夏四月癸巳朔日有食之是月射鹿不視朝五月乙

亥司天王白李正等進歷六月甲午赦冬十一月歲星犯月

十二年春正月甲戌夜觀燈二月己丑朔以御史大夫蕭和斯為北院樞密使賜對衣鞍馬夏五月庚午以旱命左右以水相沃頃之果雨六月甲午祠木葉山及黃河秋如黑山赤山射鹿

十三年春正月自丁巳晝夜酣飲者九日丙寅宋欲城益津關命南京畱守高勳統軍使崔延勳以兵擾之癸

酉殺獸人哈里二月庚寅漢遣使來告欲巡邊徼乞張

聲援壬辰如黃河癸巳觀羣臣射賜物有差乙巳老人

星見三月癸丑朔殺鹿人默爾竒梟其首以示掌鹿者

夏四月壬寅獵于潢河五月壬戌烏梁海所進花鹿生

麝六月癸未近侍傷獐杖殺之甲申殺獐人哈瑪爾壬

辰詔諸路錄囚秋七月辛亥朔漢以宋侵來告乙丑薦

時蓋於廟八月甲申以生日縱五坊鷹鶻戊戌幸近山

呼鹿射之旬有七日而後返九月庚戌朔以青牛白馬

祭天地飲于野次終夕乃罷辛亥以酒脯祭天地復終
夜酣飲冬十月丙申漢以宋侵來告十一月庚午獵飲
于虞人家凡四日十二月戊子射野鹿賜虞人物有
羞庚寅殺羸人和卓

遼史卷六

遼史卷六考證

穆宗紀一應歷四年周攻漢命政事令耶律達魯授之
按資治通鑑稱是年北漢入寇請兵于契丹契丹
遣其武定節度使政事令楊衮將萬餘騎如晉陽據
此則契丹所遣者楊衮而遼史則為耶律達魯豈敵
祿本是楊衮而獲賜姓者耶

九年夏四月周拔益津瓦橋淤口三關五月乙巳朔陷
瀛莫二州辛未周兵退 按資治通鑑載是年周世

宋之拔三關得莫州在四月而瀛州之降乃在五月朔其退兵于五月壬子遼史記陷瀛莫二州于五月朔辛未周兵即退俱有誤

遼史卷六考證

欽定四庫全書薈要卷六千一百三十二

遼史卷七

元中書右丞相總裁托克托等修

本紀第七

穆宗一

十四年春正月戊寅朔奉安神燾戊戌漢以宋將來襲
馳告二月壬子詔西南面招討使特烈進兵援漢癸亥
如潢河戊辰支解鹿人摩多哈喇等七人于野封土識

其地已巳如老林東濼壬申漢以敗宋兵石州來告夏

四月丁巳漢以擊退宋軍遣使來謝是月黃龍府甘露

降五月射舐嫌鹿于白鷹山至于泱旬六月丙午朔獵

于玉山竟月忘返秋七月壬辰以酒脯祀黑山八月乙

巳如磴子嶺呼鹿射之獲鹿四賜虞人紐歡等物有差

丁未還宮戊申以生日值天赦不受賀曲赦京師囚乙

卯錄囚九月黃室韋叛冬十月丙午近侍烏爾古綽進

石錯賜金二百五十兩丙辰以掌鹿舒蘇代幹里為扎

色轄賜金帶金盞銀二百兩所隸死罪以下得專之十
一月壬午日南至宴飲達旦自是晝寢夜飲殺近侍轄
魯於禁中十二月丙午以黑兔祭神烏爾古叛掠民財
詳袞僧隱與戰敗績僧隱及伊實等死之

十五年春正月己卯以樞密使伊勒希為行軍都統虎
軍詳袞齊蘇為行軍都監益以圖魯卜部軍三百合兵
討之烏爾古額爾奇木子博勒岱獨不叛詔褒之是月
老人星見二月壬寅朔日有食之上東辛甲寅以獲鴨

除鷹坊刺面腰斬之刑復其徭役是月烏爾古殺其長
蘇爾特以降復叛三月癸酉近侍棟爾進七筋不時手
刃刺之丁丑大黃室韋酋長伊聶濟叛癸未五坊四十
戶叛入烏爾古癸巳虞人色勒題偵鵝失期加炮烙鐵
梳之刑而死夏四月乙巳小黃室韋叛伊勒希齊蘇等
擊之為室韋所敗遣使詰之乙卯以托里代伊勒希為
都統以農古為監軍率輕騎進討仍令塔瑪錫濟爾持
詔招諭五月壬申錫濟爾奏諭之不從伊勒希以達林

蘇二羣牧兵追至柴河與戰不利甲申庫果濟奏室韋
長伊聶濟亡入德呼勒六月辛亥伊楞古獻良馬賜銀
二千兩以近侍呼喇先以聞賜銀千兩是月德呼勒降
秋七月甲戌伊勒希奏烏爾古至河德灤遣額爾奇木
華喇伊勒希巴察實擊之丁丑烏爾古掠上京北榆林
峪遣林牙蕭幹討之庚辰伊勒希等與烏爾古戰不利
十月丁未察實與烏爾古戰敗之十二月甲辰以近侍
喜格私歸殺其妻丁未殺近侍蘇嚕克駐蹕黑山平淀

十六年春正月丁卯朔被酒不受賀甲申微行市中賜酒家銀絹乙酉殺近侍白海及家僕善福雅爾噶樞密使門吏隆科塔瑪舒嚕三月己巳東幸庚午獲鴨甲申獲鵝皆飲達旦五月甲申以歲旱泛舟于池禱雨不雨捨舟立水中而禱俄頃乃雨六月丙申以白海死非其罪賜其家銀絹秋七月壬午諭有司凡行幸之所必高立標識令民勿犯違以死論八月丁酉漢遣使貢金器鎧甲閏月乙丑觀野鹿入馴鹿羣立馬飲至晡九月庚

子重九宴飲夜以繼日至壬子乃罷己未殺狼人紐幹
哩十月庚辰漢主有母喪遣使賻弔十二月甲子幸酒
人伯勒格家復幸殿前都點檢耶律伊勒哈第宴飲連
日賜金盃細錦及孕馬百疋左右授官者甚衆戊辰漢
遣使來貢是冬駐蹕黑山平淀

十七年春正月庚寅朔林牙蕭幹郎君耶律賢適討烏
爾古還帝執其手賜酒授賢適右皮室詳袞伊勒希齊
蘇轄哩賜醕酒以辱之乙卯伊勒希巴古裕獻烏爾古

俘二月甲子高勳奏宋將城益津闕請以偏師擾之上

從之夏四月戊辰殺鷹人達魯丙子射柳祈雨復以水

沃羣臣五月辛卯殺鹿人扎喀壬辰北府宰相蕭哈里

薨輟朝罷重五宴六月己未支解雉人壽格寧古殺鹿

人四十四人是夏駐蹕裏潭秋八月辛酉生日以政事

令安巴達病亟不受賀九月自丙戌朔獵于黑山赤山

至于月終冬十月乙丑殺酒人索紐十一月辛卯殺近

侍延壽壬辰殺豕人額伯哩赫嚕珠嚕準訥呀庫庚子

司天臺奏月當食不虧上以為祥歡飲達旦壬寅殺鹿
人唐古直格薩喇十二月辛未手殺饗人哈里復嚮之
是冬駐蹕黑河平淀

十八年春正月乙酉朔宴于宮中不受賀己亥觀燈于
市以銀百兩市酒命羣臣亦市酒縱飲三夕二月乙卯
幸五坊使錫沙哩家宴飲達旦三月甲申如潢河乙酉
獲駕鵝祭天地造大酒器刻為鹿文名曰鹿甌貯酒以
祭天庚戌殺鷓人呼圖哩近侍華格及監囚哈里仍判

哈里之尸夏四月癸丑殺彘人察爾吉己巳詔左右從

班有材器幹局者不次擢用老耄者增俸以休于家五

月丁亥重五以被酒不受賀壬辰獲鵝于碩格水野飲

終夜丁酉與政事令蕭巴雅爾南京留守高勲太師珠

克劉承訓酣飲連日夜己亥殺鹿人佛德埒克陶罕扎

卜庫舒古寧察布默克特達勒達六月丙辰殺彘人托

諾己未為殿前都點檢伊勒哈置神帳曲赦京畿囚甲

戌特烈於鵬窠中得牝犬來進是夏清暑裏潭秋七月

辛丑漢主承鈞殂子繼元立來告遣使弔祭九月戊子
殺詳袞巴蘭伊喇罕都等四人己丑登小山祭天地戊
戌知宋欲襲河東諭西南面都統南院大王特烈豫為
之備己亥獵熊以喚鹿人布庫并掖庭戶賜伊勒哈甲
辰以伊勒哈兼政事令仍以黑山東穆辰地數十里賜
之以紐歡為近侍女直詳袞嘉們為本部額爾奇木是
秋獵于西京諸山冬十月辛亥朔宋圍太原詔特烈為
兵馬總管發諸道兵救之十一月癸卯冬至被酒不受

賀十二月丁丑殺酒人塔爾噶是冬駐蹕黑山東川

十九年春正月己卯朔宴宮中不受賀己丑立春被酒
命殿前都點檢伊勒哈代行擊土牛禮甲午與羣臣為
葉格戲戊戌醉中驟加左右官乙巳詔太尉華格曰朕
醉中處事有非無得曲從酒解可覆奏自立春飲至月
終不聽政三月甲寅漢劉繼元嗣立遣使乞封冊辛酉
遣韓知範冊為皇帝癸亥殺前導摩濟喇命剉其屍棄
之甲子漢遣使進白鹿己巳如懷州獵獲熊歡飲方醉

馳還行宮是夜近侍霄格盪人華格庖人錫衮等六人
反帝遇弒年三十九廟號穆宗後附葬懷陵重熙二十
一年諡曰孝安敬正皇帝

贊曰穆宗在位十八年知女巫妖妄見誅諭臣下濫刑
切諫非不明也而荒耽于酒畋獵無厭偵鵝失期加炮
烙鐵梳之刑獲鴨甚歡除鷹坊刺面之令賞罰無章朝
政不視而嗜殺不已變起肘腋宜哉

遼史卷七

遼史卷七考證

應歷十四年五月射鹿于白鷹山六月獵于玉山八月

如磴子嶺呼鹿射之按遊幸表是年五月獵于玉

山射鹿于白嶺山六月射鹿于格德泉今本紀獵玉

山在六月而格德泉射鹿在五月又以白嶺山為白

鷹山又呼鹿射之表在七月不言磴子嶺而附綴赤

山射鹿之後與本紀均互異考表與本紀往往不符

其是非未可臆斷並兩存之後倣此

應歷十五年三月五坊人四十戶叛入烏爾古四月小黃室韋叛六月德呼勒來降七月烏爾古掠上京

按部族表五坊人之叛在二月小黃室韋之叛德呼勒之降及烏爾古掠上京等事較本紀所載均先一月

應歷十九年三月遣韓知範冊漢劉繼元為皇帝 按五代史作韓知璠

遼史卷七考證